

四部備要書目提要

(子部)

冊三

四部備要書目提要卷三(子部)

荀子 二十卷

〔著者小傳〕荀卿戰國趙人名況時人相尊而號爲卿漢人或稱孫卿年五十始游學於齊仕爲祭酒齊人或讒況乃適楚爲蘭陵令況嫉濁世之政遂推儒墨道德之行事著書數萬言其學以孔子爲標準倡性惡之說謂人性皆惡不以禮義矯正之則不能爲善其旨與孟子異有荀子傳於世卒葬蘭陵 楊倞唐號州弘農人汝土子

〔四庫提要〕周荀況撰況趙人嘗仕楚爲蘭陵令亦曰荀卿漢人或稱曰孫卿則以宣帝諱詢避嫌名也漢志儒家載荀卿三十三篇王應麟考證謂當作三十二篇劉向校書序錄稱孫卿書凡三百二十三篇以相校除重複二百九十篇定著三十三篇爲十二卷題曰新書唐楊倞分易舊第編爲二十卷復爲之註更名荀子卽今本也考劉向序錄卿以齊宣王時來游稷下後仕楚春申君死而卿廢然史

記六國年表載春申君之死上距宣王之末凡八十七年史記稱卿年五十始游齊則春申君死之年卿年當一百三十七矣於理不近晁公武讀書志謂史記所云年五十爲年十五之譌意其或然宋濂荀子書後又以爲襄王時游稷下亦未詳所本總之戰國時人爾其生卒年月已不可確考矣況之著書主於明周孔之教崇禮而勸學其中最爲口實者莫過於非十二子及性惡兩篇王應麟困學紀聞據韓詩外傳所引卿但非十子而無子思孟子以今本爲其徒李斯等所增不知子思孟子後來論定爲聖賢耳其在當時固亦卿之曹偶是猶朱陸之相非不足訝也至其以性爲惡以善爲僞誠未免於理未融然卿恐人恃性善之說任自然而廢學因言性不可恃當勉力於先王之教故其言曰凡性者天之所就也不可學不可事禮義者聖人之所生也人之所學而能所事而成者也不可學不可事而在人者謂之性可學而能可事而成之在人者謂之僞是性僞之分

也其辨白僞字甚明楊倞註亦曰僞爲也凡非天性而人作爲之者皆謂之僞故僞字人旁加爲亦會意字也其說亦合卿本意後人昧於訓詁誤以爲真僞之僞遂譁然指擊謂卿蔑視禮義如老莊之言是非惟未睹其全書卽性惡一篇自篇首二句以外亦未竟讀矣平心而論卿之學源出孔門在諸子之中最爲近正是其所長主持太甚詞義或至於過當是其所短韓愈大醇小疵之說要爲定論餘皆好惡之詞也楊倞所註亦頗詳洽唐書藝文志以倞爲楊汝士子而宰相世系表則載楊汝士三子一名知溫一名知遠一名知至無名倞者表志同出歐陽修手不知何以互異意者倞或改名如溫庭筠之一名岐歟

〔卷目〕(一)勸學篇修身篇(二)不苟篇榮辱篇(三)非相篇非十二

子篇仲尼篇(四)儒效篇(五)王制篇(六)富國篇(七)王霸篇

(八)君道篇(九)臣道篇致仕篇(十)議兵篇(十一)彊國篇天論

篇(十二)正論篇(十三)禮論篇(十四)樂論篇(十五)解蔽篇
(十六)正名篇(十七)性惡篇君子篇(十八)成相篇賦篇(十九)
大略篇(二十)宥坐篇子道篇法行篇哀公篇堯問篇

孔叢子

七卷附釋文

〔著者小傳〕孔鮒秦人孔子後字子魚亦字甲博通經史秦始皇併
天下召爲魯國文通君遷少傅李斯始議焚書鮒聞之收其家論語
尚書孝經等藏於舊宅壁中隱居嵩山教弟子百餘人後陳涉爲楚
王聘爲太傅尋託疾而退卒於陳所著書名曰孔叢子

〔四庫提要〕舊本題曰孔鮒撰所載仲尼而下子子上子高子順之言
行凡二十一篇又以孔臧所著賦與書上下二篇附綴於末別名曰
連叢鮒字子魚孔子八世孫仕陳涉爲博士臧高祖功臣孔襲之子
嗣爵蓼侯武帝時官太常其書文獻通考作七卷今本三卷不知何
人所併晁公武讀書志云漢志無孔叢子儒家有孔臧十篇雜家有

孔甲盤盂書二十六篇其獨治篇鮒或稱孔甲意者孔叢子卽孔甲盤盂連叢卽孔臧書案漢書藝文志顏師古註謂孔甲黃帝之史或云夏后孔甲似皆非則孔叢非盤盂又志於儒家孔臧十篇外詩賦家別出孔臧賦二十篇今連叢有賦則亦非儒家之孔臧公武未免附會朱子語類謂孔叢子文氣軟弱不似西漢文字蓋其後人集先世遺文而成之者陳振孫書錄解題亦謂案孔光傳孔子八世孫鮒魏相順之子爲陳涉博士死陳下則固不得爲漢人而其書記鮒之沒則又安得以爲鮒撰其說當矣隋書經籍志論語家有孔叢七卷註曰陳勝博士孔鮒撰其序錄稱孔叢家語並孔氏所傳仲尼之旨則其書出於唐以前然家語出王肅依託隋志旣誤以爲真則所云孔叢出孔氏所傳者亦未爲確證朱子所疑蓋非無見卽如舜典禋于六宗何謂也子曰所宗者六皆潔祀之也埋少牢於泰昭所以祭時也祖迎於坎壇所以祭寒暑也主於郊宮所以祭日也夜明所以

祭月也幽禋所以祭星也雩禋所以祭水旱也禋于六宗此之謂也
其說與僞孔傳僞家語並同是亦晚出之明證也其中第十一篇即
世所傳小爾雅註疏家往往引之然皆在晉宋以後惟公羊傳疏所
引賈逵之說謂俗儒以六兩爲鎰正出此書然謂之俗儒則非漢藝
文志之小爾雅矣又水經注引孔叢子曰夫子墓塋方一里在魯城
北六里泗水上諸孔氏封五十餘所人名昭穆不可復識有銘碑三
所獸碣具存云云今本無此文似非完帙然其文與全書不類且不
似孔氏子孫語或酈道元誤證抑或傳寫有譌以他書誤題孔叢歟
〔卷目〕(一)嘉言論書記義(二)刑論記問雜訓居衛(三)巡守公儀
抗志小爾雅(四)公孫龍儒服對魏王(五)陳士義論勢執節(六)
詰墨獨治問軍禮答問(七)連叢子上下(附釋文)

孫子

十三卷曹操等十家註附鄭友賢孫子十家註遺說又畢以珣孫子敘錄一卷

〔著者小傳〕

孫武春秋齊人以兵法見吳王闔廬吳王用爲將西破

強楚北威齊晉顯名諸侯有兵法十三篇 曹操後漢譙人字孟德

少機警有權數光和末黃巾起拜騎都尉討潁川賊會董卓擅朝政
操散家財合義兵討卓建安中操至洛陽獻帝假操節鉞錄尚書事
洛陽殘破迎帝都許破袁紹袁術自爲大將軍進位丞相加九錫爵
魏王卒諡武黃初初追尊武帝 孟氏(未詳) 李筌唐時人居少

室山有將略嘗著太白陰經於行軍制勝之術指畫甚詳仕至仙州
刺史後入山訪道不知所終 杜牧唐萬年人佑孫字牧之善屬文
官至中書舍人剛直有奇節詩情致豪邁人號爲小杜以別於杜甫
有樊川集 陳皞(未詳) 賈林(未詳) 梅堯臣宋宣城人字聖

俞工詩以深遠古淡爲意仁宗召試賜進士出身累遷都官員外郎
預修唐書卒有唐載記毛詩小傳宛陵集等書 王皙宋太原人天

禧中官翰林學士有春秋皇綱論及春秋通義異義 何延錫(未

詳) 張預宋東光人字公立有百將傳 鄭友賢(未詳) 畢以

珣(未詳) 孫星衍(見經部) 吳人驥(未詳)

〔本書略述〕孫子十三卷周孫武撰已入四庫著錄略稱此書註本極夥隋書經籍志所載自曹操外有王淩張子尙賈詡孟氏沈友諸家唐志益以李筌杜牧陳皞賈林孫鎬諸家馬端臨經籍考又有紀燮梅堯臣王皙何氏諸家歐陽修謂兵以不窮爲奇宜其說者之多其言最爲有理然至今傳者寥寥應武舉者所誦習惟坊刻講章鄙俚淺陋無一可取故今但存其本文著之於錄

以上提要語

此本係孫氏

星衍以道藏所刊宋吉天保十家注本詳加校勘其中脫誤之處據潛夫論通典北堂書鈔太平御覽藝文類聚等書補正者計二百四十餘條並附畢以珣孫子敘錄一卷精審完善較四庫存文刪註之本實勝倍蓰

〔卷目〕(首)敘錄(一)計(二)作戰(三)謀攻(四)形(五)勢(六)虛

實(七)軍爭(八)九變(九)行軍(十)地形(十一)九地(十二)火

攻(十三)用間後(附遺說)

吳子

一卷

〔著者小傳〕吳起戰國衛人嘗學於曾子善用兵初仕魯聞魏文侯賢往歸之文侯以爲將擊秦拔五城拜西河守後爲魏相公叔所忌譖之起奔楚楚任之爲相諸侯皆患楚之強起之爲將與士卒最下者同衣食其爲相明捐不急之官廢公族疏遠者以養戰士務在強兵悼王死楚之貴戚大臣多怨起者因攻起而射殺之有吳子六篇

〔四庫提要〕周吳起撰起事蹟見史記列傳司馬遷稱起兵法世多有而不言篇數漢藝文志載吳起四十八篇然隋志作一卷賈誼註唐志並同鄭樵通志略又有孫鑄註一卷均無所謂四十八篇者蓋亦如孫武之八十二篇出於附益非其本書世不傳也晁公武讀書志則作三卷稱唐陸希聲類次爲之凡說國料敵治兵論將變化勵士六篇今所行本雖仍併爲一卷然篇目並與讀書志合惟變化作

應變則未知孰誤耳起殺妻求將鬻臂盟母其行事殊不足道然嘗受學於曾子耳濡目染終有典型故持論頗不詭於正如對魏武侯則曰在德不在險論制國治軍則曰教之以禮勵之以義論爲將之道則曰所慎者五一曰理二曰備三曰果四曰戒五曰約大抵皆尙有先王節制之遺高似孫子略謂其尙禮義明教訓或有得於司馬法者斯言允矣

〔卷目〕一卷分上下

司馬法

三卷

〔著者小傳〕司馬穰苴春秋齊人本姓田齊景公時爲大司馬故曰司馬穰苴齊威王用兵倣穰苴之法諸侯朝齊乃使大夫追論古者司馬兵法附穰苴於其中因號曰司馬穰苴兵法

〔四庫提要〕舊題齊司馬穰苴撰今考史記穰苴列傳稱齊威王使大夫追論古者司馬兵法而附穰苴於其中因號曰司馬穰苴兵法

然則是書乃齊國諸臣所追輯隋唐諸志皆以爲穰苴之所自撰者
非也漢志稱軍禮司馬法百五十五篇陳師道以傳記所載司馬法
之文今書皆無之疑非全書然其言大抵據道依德本仁祖義三代
軍政之遺規猶藉存什一於千百蓋其時去古未遠先王舊典未盡
無徵撫拾成編亦漢文博士追述王制之類也班固序兵權謀十三
家形勢十一家陰陽十六家技巧十三家獨以此書入禮類豈非以
其說多與周官相出入爲古來五禮之一歟胡應麟筆叢惜其以穰
苴所言參伍於仁義禮樂之中不免懸疣附贅然要其大旨終爲近
正與一切權謀術數迥然別矣隋唐志俱作三卷世所行本以篇頁
無多并爲一卷今亦從之以省繁碎焉

〔卷目〕（上）仁本第一天子之義第二（中）定爵第三（下）嚴位第四

用衆第五

管子 二十四卷

〔著者小傳〕管仲春秋齊潁上人名夷吾一作敬仲敬其諡也相桓公稱仲父富國強兵攘夷狄尊周室九合諸侯一匡天下所著有管子八十六篇 房玄齡唐臨淄人彥謙子字喬幼警敏博綜典籍善屬文書兼艸隸年十八舉進士授羽騎尉太宗征伐未嘗不從及卽位累進左僕射徙梁國公居相位十五年進司空累表固辭玄齡與杜如晦共綰朝政世稱房謀杜斷卒諡文昭 按舊唐書作房喬字玄齡此從新唐書

〔四庫提要〕舊本題管仲撰劉恕通鑑外紀引傳子曰管仲之書過半便是後之好事者所加乃說管仲死後事輕重篇尤復鄙俗葉適水心集亦曰管子非一人之筆亦非一時之書以其言毛嬙西施吳王好劍推之當是春秋末年今考其文大抵後人附會多於仲之本書其他姑無論卽仲卒於桓公之前而篇中處處稱桓公其不出仲手已無疑義矣書中稱經言者九篇稱外言者八篇稱內言者九篇

稱短語者十九篇稱區言者五篇稱雜篇者十一篇稱管子解者五篇稱管子輕重者十九篇意其中孰爲手撰孰爲記其緒言如語錄之類孰爲述其逸事如家傳之類孰爲推其義旨如箋疏之類當時必有分別觀其五篇明題管子解者可以類推必由後人混而一之致滋疑竇耳晁公武讀書志曰劉向所校本八十六篇今亡十篇考李善註陸機猛虎行曰江邃文釋引管子云夫士懷耿介之心不蔭惡木之枝惡木尙能恥之況與惡人同處今檢管子近亡數篇恐是亡篇之內而遽見之則唐初已非完本矣明梅士享所刊又復顛倒其篇次如以牧民解附牧民篇下形勢解附形勢篇下之類不一而足彌爲竄亂失真此本爲萬曆壬午趙用賢所刊稱由宋本翻雕前有紹興己未張嶠後跋云舛脫甚衆頗爲是正用賢序又云正其脫誤者逾三萬言則屢經點竄已非劉向所校之舊然終愈於他氏所妄更者在近代猶善本也舊有房玄齡註晁公武以爲尹知章所託

然考唐書藝文志玄齡註管子不著錄而所載有尹知章註管子三十卷則知章本未託名殆後人以知章人微玄齡名重改題之以炫俗耳案舊唐書知章絳州翼城人神龍初官太常博士睿宗卽位拜禮部員外郎轉國子博士有孝經註老子註今並不傳惟此註藉玄齡之名以存其文淺陋頗不足採然蔡條鐵圍山叢談載蘇軾蘇轍同入省試有一題軾不得其出處轍以筆一卓而以口吹之軾因悟出管子註則宋時亦採以命題試士矣且古來無他註本明劉績所補註亦僅小有糾正未足相代故仍舊本錄之焉

〔卷目〕本書二十四卷共八十六篇內分經言九篇外言八篇內言九篇短語十九篇區言五篇雜篇十一篇解五篇輕重十九篇

慎子

一卷附逸文

〔著者小傳〕慎到戰國趙人學黃老道德之術爲慎子四十二篇今存五篇申不害韓非嘗稱之

〔四庫提要〕周慎到撰到趙人中興書目作瀏陽人陳振孫書錄解

題曰慎到趙人見於史記瀏陽在今潭州吳時始置縣與趙南北了不相涉蓋據書坊所稱不知何謂也則稱瀏陽者非矣明人刻本又云到一名廣案陸德明莊子釋文田駢下註曰慎子云名廣然則駢一名廣非到一名廣尤舛誤也莊子天下篇曰慎到棄知去己而緣不得已泠汰於物以爲道理曰知不知將薄知而後鄰傷之者也謏髀無任而笑天下之尙賢也縱脫無行而非天下之大聖椎拍輓斷與物宛轉舍是與非苟可以免不師智慮不知前後魏然而已矣推而後行曳而後往若飄風之還若羽之旋若磨石之隧全而無非動靜無過未嘗有罪是何故夫無知之物無建己之患無用知之累動靜不離於理是以終身無譽故曰至於若無知之物而已無用賢聖夫塊不失道豪傑相與笑之曰慎到之道非生人之行而至死人之理適得怪焉云云是慎子之學近乎釋氏然漢志列之於法家今考